

24/02/1997

Kedah tubuh universiti di Pulau Tuba

ALOR STAR, Ahad - Menteri Besar, Datuk Seri Sanusi Junid, mengumumkan penubuhan sebuah universiti di Pulau Tuba, Langkawi yang akan dinamakan Langkawi International University of Tomorrow.

Beliau berkata, kerajaan negeri mewartakan seluruh Pulau Tuba yang mempunyai keluasan 1,900 hektar untuk tujuan itu.

Menurutnya, perancangan bagi mewujudkan universiti yang berkonsep masa depan itu dipersetujui Perdana Menteri, Datuk Seri Dr Mahathir Mohamad.

Katanya, untuk memastikan Kedah tidak ketinggalan dalam era multimedia, kerajaan akan memberi perhatian terhadap bidang pendidikan.

"Sehubungan itu, kerajaan dengan beberapa universiti sedang merancang mewujudkan lebih banyak institusi pendidikan di Baling dan Kulim.

"Program mentelaah di masjid yang kini membabitkan kira-kira 40,000 pelajar di 64 masjid setiap malam, juga digabungkan dengan program mengimarahkan masjid sebagai pusat pembangunan ummah," katanya.

Beliau berkata demikian dalam istiadat menyembah tahniah dan penganugerahan darjah serta bintang kebesaran sempena ulang tahun kelahiran Sultan Kedah, di Istana Anak Bukit, hari ini.

Mengenai prestasi ekonomi negeri, Sanusi berkata sepanjang tempoh Rancangan Malaysia Keenam (RM-6) lalu, Keluaran Dalam Negara Kasar (KDNK) mencatatkan pertumbuhan 9.9 peratus setahun, manakala pendapatan perkapita meningkat ke tahap RM3,791 setahun berbanding RM2,612 pada 1990.

Katanya, Kedah yang sebelum ini bergantung kepada sektor pertanian dengan tumpuan terhadap tanaman padi gagal keluar daripada belunggu kemiskinan.

"Bagaimanapun, penerokaan ke bidang perindustrian dan sektor berdaya maju lain berjaya menurunkan peratusan rakyat termiskin dan dijangka terus menurun kepada sekurang-kurangnya lapan peratus menjelang tahun 2000.

"Sepanjang tempoh RM-7 usaha membasmi kemiskinan dilaksanakan sehingga ke tahap jihad dengan menubuhkan Kompleks Jihad Membasmi Kemiskinan, di Paya Pahlawan, Jitra.

"Selain itu, kerajaan mengenal pasti tanah di seluruh negeri untuk pembinaan rumah rakyat termiskin serta mendirikan rumah anak yatim dan orang cacat di setiap daerah," katanya.

Sanusi juga berkata, selain Langkawi, kerajaan bercadang memajukan kawasan Tasik Pedu dan Bukit Kayu Hitam serta mengeksplorasi sumber pulau, hutan, bukit, gunung, hutan bakau, sungai dan gua untuk kegiatan ekonomi serta pelancongan.

Menurutnya, kerajaan turut merancang membangunkan Kedah dengan mencontohi kemajuan dan kepesatan pembangunan negara lain.

(END)